

桂平縣志

桂平縣志

桂平縣志卷三十八

紀人

藝術傳

古之言六藝者或云詩書易禮樂春秋或指禮樂射御書數
兩者相持解之者云前者以備大學所習後者以爲生民普
通之教亦善於說經矣夫禮樂義含中和宜小大由之射御
則養勇之法門書數爲執業之利器是以古人重焉漢世劉
歆校書自經子詩賦兵家而外復有天文歷譜五行著龜雜
占形法醫經經方房中神僊諸學約而舉之卽今醫卜星相
也唐代書算與律各立專科至宋益以醫畫兩門由是藝途

彌博矣新學既興凡天文輿地算術格致體操音樂畫圖手工咸設專科其理與法多異於昔人所云要皆在技能之列莊子云古之人明於本數係於末度小大精粗六通四闢其運無乎不在又謂百家衆技各有所用時有所長未可重大而輕小是丹而非素也桂平風俗古樸俗安耕讀儀容弗忒聲律未諳其習射澤宮者非世人所貴故百步之技遠近無聞加車戰既頽良御不作此通國所廢不獨一方未嫻也若夫星相卜筮決休咎談壽妖雖有善者無徵不信至於學校技能屬大輅椎輪尙無精擅後生可畏還待來年亦有依歸六法礪研九章扇吳李之風流窺髀韶之奧旨度量精微丹

青忘老其人尙存於例不收今取能書能醫爲邑民所信仰者名曰藝術著之於篇

岑崑字小山嘉慶間歲貢故善書時江西曹文恪秀先以書名嘗訪知府於胡南藩於潯崑從學究筆法書益工得王右軍之雋邑道前街趙氏草藥肆有其七言墨聯上北門馮聖宮西山洗石庵各題額皆崑遺蹟

陳常憲亦善書學鍾太傅得其整子祖敬字藩西戊午舉人賴某佚其名學趙子昂書得其韻與岑崑陳常憲爲姻亞親

府以上
志

黃國良字元臣居廂光緒乙亥科舉人能書往日士人臨池

多爲院體所困但期縱橫端整出以光墨便稱能書至於執筆則筆頭右拱毫端左拒點畫波磔皆取順勢故體庸而氣弱學之終身不離故武國良以右手病廢代以左腕轉以逆勢得免順拖之弊故每一下筆柔毫翻卷波折多姿世人喜其書而不知其所以然也

按邑先輩如黃澹軒與林若逋父子賴芸芝賀慶唐父子陳紫元俱有書名居止行事俱散見於各傳不再錄

程尹颺居軍陵里官河村舉人程道光之子年二十一補博士弟子員尤精於醫其學於今古方術無所不窺而能由博歸約故治病悉桴應吉一里何桂芬家稍裕妻病肉跳頭大

厚幣延諸醫遠近已遍俱無效尹颺至下桂附分量特重桂
芬不遽信減半試服疾旋愈復延尹颺診之頓足曰汝爲何
減輕吾劑今雖愈明年八月中秋復發無救矣及期婦病果
發桂芬思尹颺言遣使求視詞甚哀答曰去亦無益矣是晚
三更婦竟死同里韋村蒙姓有孫媳孕纔一月而病診之拱
手曰冬間翁將抱孫也及期果產男守備黃某繼室年且五
十三妊期已過體殊不適雖名醫亦茫然不知何症尹颺入
門見其額光奪目唇左潤如珠卽向黃揖曰夫人麟珠結半
月矣逾十月產男其神驗多如此中村何有奇母年逾七旬
病痿垂危子孫爲備棺矣尹颺診而笑曰此老阿婆尙有微

息若服吾藥匪但不死且可再壽十年後竟如其言粵人有王其昌者商於貴縣妾隨侍食粥四十日無矢溺服尹颺藥三時許腹奇痛響如雷大號苦各醫僉云必死須臾大小便霈然遂愈衆咸神之永和里福山村某翁有孫五日不食一息奄奄醫者咸投桂附尹颺到甫施聞望急搖手曰不用桂不用桂信吾言包汝三更貴孫索粥食矣三天可全愈後果然平南麥公和平碼頭夥伴四人俱病危在旦夕備快船請既至病者面如梔子曰如桂圓膚急用瓶中藥水滴目上各與數小丸入口病者卽轉身舉手又晚起身自服藥更衣數日平復其餘着手春回者殊多不能盡錄家貧應秋試沿途

藉診金資逆旅自縣至省陸路數百里荒村茅店咸耳其術之高性慈儉病而無錢者贈醫藥不吝祖及父俱爲名孝廉貴於一方未嘗以此自炫來請者欲備車馬輒却之手著驗方四卷珠批人身臟腑脉絡全圖凡人死生之故標解瞭然卒年七十一子炳珍業儒強記傳父醫術有名於鄉著經驗良方四卷童人二面同族懋麟得其傳愈人不少鄰村盧某中暑已瀕死服其藥一次而蘇名遂噪

程士超號上達軍陵里竹山塘村人性靈敏幼誦羣經早能領解貧不能攻舉業廼潛心藝術十餘齡遊廣東訪名師久無所遇西反遊桂林受業於朱易易江西人生乾隆間習醫

得其鄉先輩喻嘉言之傳士超日隨之臨症夜則誦古方書
一生得力全在於斯旋隨易回潯營醫易之名大著於郡無
貴賤咸尊之曰朱先生居十餘年易遊世士超傳其衣鉢施
術不亞於易故衆人亦以尊易者尊士超不止有若之似夫
子也士超益日加脩勵傳習師說外並參攷張介賓薛立齋
兩家之言故於外淫內傷輒應手而瘥道光間匪漸起清廷
調貴州標營駐潯軍士患疫甚劇糧台楊某聘士超醫全營
病者俱愈保賞六品頂戴洪秀全起事縣主李孟羣調軍駐
潯復患疫延士超隨營醫亦收效奏給卽補縣丞歸部選用
咸豐五年值陳開陷城旋里家居將平日經驗諸方及各病

體用輯成一書名星洲實錄

星洲者朱易懸壺之號士超醫道宏于星洲故著書不忘其本

也

以光緒十三年終世壽八十四平生醫案不能盡憶再要者同治七年鹿令傳霖有姑母孀居隨任年三十餘病腦痛服補劑無驗而且腹漸大如斗兩頰色似桃華月信且斷諸醫疑私胎士超診之六脉絃實作而曰此腹積藥餌所致積藥清則脹消月事來矣立方施治所言果效治腦病不用藥屬鑄金爲枕枕之枕變黑令匠以火化去再枕如是三次而病愈鹿令贈言曰神同和緩焦令肇駿向有鴉片癖患浮腫吸煙不能入口諸醫湯藥無靈或用龍肝研粉敷全體仍無效士超先發其汗次理其脾遂愈贈曰十全爲上其他官紳

受醫愈而題贈甚多自程尹鵬既已後起者士超也 兆麟

又名石麟士超子幼傳父學復參究朱丹溪心法張隱菴傷寒論集註再從事於閩人陳念祖之說著一書名醫中參攷論六卷藏于家多發古人所未發並有本草經驗質性篇書未成而卒年四十八生前醫譽克廸前光求者絡繹常年晨出暮歸未嘗稍暇子錦堂性亦能醫

以上
采訪

黃德仁字北溪業醫善拳勇里人有以醫請者雖貧必至甚者給之藥存活殊衆同治間軍興巡撫劉長佑布政使劉坤一督師駐潯州嘗招致幕府軍中無慮數千人奏藥輒效乙卯之變避亂鄉間一日道出大宣里有賊數十人奪其貨笑

予之歸或問其故曰吾不難手刃若輩顧今何時獨不慮其尋仇以要我耶已而奪貨者知其故健者也相誠不敢再犯

子國良見前

府志

黃錫遐別字東初幼攻醫術脉學法李瀕湖治法宗張介賓每切脉輒能細數病源確定治法常閒行入市塗遇里人莫姓者驚謂之曰汝病已殆不治五日後不可救矣莫不信五日果病馳倅延視並詢何以能預知之故答曰吾觀其面目青黯額際唇間尤甚此腎將絕早治猶可今病發不可爲矣速備後事可也其精如此至今鄉中遺老談善脉者猶稱道錫遐不已 應桂字乙枝錫遐子少承庭訓治醫業尤精兒

痘等科性豪俠喜交結咸同之亂以軍功得六品頂戴遇醫
流中有一技之長者輒降心求教務得其傳以故每遇奇症
世所稱難治者均能刻日取效嘗至族人家聞隣舍兒啼聲
驚而謂之人曰此兒病已殆不治將不起矣命往探則以貧
不能備醫藥告乃爲贈醫而愈鷓鴣李某病陽縮醫者均治
以滋陰壯陽之藥不愈且加甚焉應桂至切脉已命急作蘇
荷湯與服羣醫咸嗤以鼻已而藥進除始相驚問故公曰內
經不云乎諸筋癰瘕皆屬於風陽事爲宗筋所聚風動筋癰
陽乃暴縮驅之使出病自愈耳何奇焉清季種痘法未盡善
天痘流行幾於無歲無之貧兒患者恒束手應桂遇此輩每

從飲食消息之微生蝦炒豆升發之力可比參蓂萊菔春菜
清毒之能可牟羚羊生平經驗存活甚衆 道章字萬年應
桂子後改名有章字敏年少倜儻喜浪遊於先人之業雖童
而習之未見重於鄉里後往同里耀村遇黃靜山之女患急
驚風氣息僅屬已委之地道章聞而往探心坎尙溫命以蚯
蚓研末灌醒藥而愈之名遂噪求診者日衆乃益博覽醫籍
術亦愈精而於內傷虛癆外傷金瘡各症尤見專長平生治
案頗多有家傳驗方集 陸蘭溪上秀里南喬村人博學精
醫著有蘭溪醫案未刊平生治病專尙溫補至謂溫熱發斑
亦未嘗遇一熱症蓋東垣派也 容靄謙名未詳下都里陸

村人得乙枝之傳專以張景岳爲宗邑南人多信仰之子業羣世其業黃樸初名彌厚上秀里南喬村人亦乙枝弟子治病尙平穩大補大攻之藥輒不敢輕用蓋醫流穩且健者也

以上
采訪

楊鼎光上都里人習醫以閩人陳念祖爲宗熟能朗誦其詞爲知府張祖祺所重時幕中有講西學者詆中醫不足信及病劇張勸服鼎光藥而愈起言中醫難信鼎光可信也衆醫瘡症多非十數日不瘳鼎光屢能以一二日全瘳光緒二十年以來論岐黃學者多推之同時有軍陵里黃正卿亦熟於陳氏學人身十二經絡之運行二十八脉之同異默識無遺

每診病常按脉逾時乃定劑故治病多驗惜年未三十而卒